

四庫全書

集部

欽定四庫全書

集部

御定歷代賦彙卷九十七

詳校官檢討_臣劉斯

主事銜_臣徐以坤覆勘

總校官編修_臣王燕緒

校對官中書_臣潘曾起

謄錄監生_臣任楫文

欽定四庫全書

御定歷代賦彙卷九十七

王帛

金賦

唐闕名

夫五氣降於五行五星均於五德助天地而為政體陰陽之有則犧圖八卦之文所以化成禹錫九疇之道由其平直分宗別序正位辨方春青夏赤羽黑宮黃育龜麟之體貌煥鸞鳳之文章物庶幾而盡善然後從革而

能剛若夫寅亮陰德發輝秋令帝少昊而為主神蓐收而在正生水尅木非無父母之儀承土伏火亦有謙卑之性爾其於乾道則使候入青女光垂白陸寒陰作而霜露濃殺氣橫而風雨肅此金之節也爾其於坤道則使麥苗含秀二粒同稔既收成於萬物復搖落於千株此又金之功也爾其於王事則使出軍行師擁旄仗鉞所以征叛逆而敷明伐此又金之威也爾其於人事則使農夫業就商旅懋遷儲蓄邦家之重錢刀布泉之先

此又金之利也彼觀其山川含育之秘採掇工取之程
鎔鑄陶鈞之術雕鐫磨礪之形非一途而共貫實萬象
而殊名用之為鼎天下之至實用之為劔天下之至精
用之為量天下之至信用之為鏡天下之至明亦有金
河金瀨金潭金穴金谷金陵金城金埒紫山重夷吾之
對光石訝胡人之別渤澥水之仙宮西北荒之神闕魚
龍雀鳥之玩鐘鼓樓臺之列皆具美於明圖豈能窮於
縷說余復何為長貧若斯揚雄之產非廣季布之諾無

移嫌衆口之銷鑠嘉同心之見知命舛時泰將通復否
徒效拙於凌霄實勞工於畫水無體物之奇策失緣情
之妙旨太冲三都分從陸雲之笑孟堅兩京甘受張衡
之鄙

金賦

以至寶堅剛無所爭也為韻

唐

韋 岫

山育良金世名重寶當用事於素節實稟靈於玄造由
是司歲之士敘秋之道其神曰蓐收其帝曰少昊相與
搜瑰異發鏗鏘取我於麗水淬我以輕霜用爾之寒可

以革溽暑之候用爾之勁可以摧烈火之剛遂重其珍
遂宣其利披沙之狀咸出從革之形悉至含宇宙則範
之以景名壓寰區則鑄之以神器其難得也泰累不棄
分銖是爭約人以懸市遺子以滿籛國用築臺之禮賦
揚擲地之聲或三緘而永保或一諾而必行斷以同心
斯為盡善鑠於衆口喻彼相傾是以王者之時令修彛
倫序泥封是用職貢有所垂衣守滿堂之誠命相興作
礪之語則金為世出兩示天與乃懷貪以恣攫重諾而

不捐鑽出碧石斷樸攻堅大有鎔範小有雕鐫玩物既
奢其器用窮兵又縱於戈鋌則地將愛矣君胡得焉又
尅木之意深輔火之功寡傷水之閱世疾土之處下以
勁挺司一方以減裂視四者曰吾常卓爾子不知也况
有百鍊之秀三品之殊藏之則潤屋可恃鍛之則切玉
如無子豈能馳善價入巨冶隨我躍於洪鑪

金精百鍊賦

以良冶所求在
於精鍊為韻

唐
周渭

有攻金之工兮求百鍊之精鋼涉越水之表登楚山之

陽目眇眇而有待心搖搖而不遑工曰礦斯得鍊斯力
夫何器之不良乃召風胡邀歐冶計日淹速商功衆寡
我心天縱我力神假鼓焱橐以喧飗轟雲鉞而上下金
火惟序載離寒暑光融融而皦皦疑雷擊以星流聲有
往而有還若唱予而和汝始於一而終於百鍊既存而
鍛乃舉成利器兮為國珍自私家兮獻公所於是礪以
越砥淬於江流燦龜文於叟絕射龍藻於清浮將四海
而是震豈千金而可求當赤帝之所提常聞逐鹿為庖

丁之所得未見金牛金從鍊兮白受采知成形之所在
金中選兮史亦書念逢時之不居故鍊金者非鎚鑪而
勿用選士者非考覈而何於且金生土土效積鍊於代
代作程豈上決則凜然霜鏑下麾而炯若水精為邦如
之何莫大於通變為金如之何必資於鍛鍊雖蹈刃以
垂範諒申威而去戰俟袁宏之片言符薛燭之一見

披沙揀金賦

以求實之道同
乎選才為韻

唐 李程

物有感者其沙之同流韜至精之未吐俟明鑒以來求

披墮施歷汀洲期往而有覲必專而是謀若不克見何
遠不討大無間於洪流細寧忽於潢潦必因目擊信夫
川則效珍不假鏡臨所謂地不藏寶於戲未分美惡必
在妍媸當有期於慎簡幸無見於忽遺經營乎永昌之
日徘徊乎麗水之濶初若決浮雲搖星光之的的又似
剖羣蚌貫珠彩之纍纍充一鑑而有待貫三品而方期
出輕連而沈潛自照別麗景而光炁生姿泊乎沙之汰
之既堅既好斷之則同心斯得用之則從革是寶必資

作礪自同選衆以求仁曾是滿羸未若觀學而知道伊
昔識真者寡罕遇良工遺我於一撮之內混我於衆流
之中純固空知夫自守精英不得而外融與砂磧而雜
居則如雲積處礦璞而自異詎可雷同寶既有矣況於
人乎夫辨之掌握尚辱在泥塗則將排碧沙涉清淺雖
有懷於揀金庶不遺於片善今則藻鑒既朗庸將自謀
興公雅符於通論士衡猶患於多才不然者則懷寶而
退矣曷為體物而來哉

披沙揀金賦

以求實之道同乎選才為韻

唐柳宗元

沙之為物兮視汚若浮金之為物兮恥居下流沈其質
兮五材或闕耀其德兮六府孔修然則抱成器之珍必
將有待當慎擇之日則人何求配珪璋而取貴豈泥滓
而有儔披而擇之斯焉見寶盪浸淫而顧盼指炫晃而
探討動而愈出將去幽以即明涅而不緇實既堅而且
好潛雖伏矣獲則取之翻渾渾之濁質見熠熠之殊姿
久暗未彰亦冀將君是望先迷後得孰謂棄余如遺其

隱也則雜昏昏淪浩浩晦英精兮自寶和光同塵兮合
於至道其遇也則散奕奕動融融煥美質乎其中明道
若昧兮契彼玄同儻或俯而不棄諒致美於無窮欲蓋
而彰故炯爾而見素不索何獲遂昭然而發蒙觀其振
彼汙塗積以錙銖研清暉而競出曜真質而將殊錐處
囊而纖光乍比劍拭土而異彩相符用之則行斯為美
矣求而必得不亦悅乎豈徒媚旭日以晶熒帶長川之
清淺皎如珠吐類剖蚌而乍分聚兮星繁似流雲之初

卷是以周詩作比而祈招即詠陸文可侔而昭明是選
若然者可以議披沙之所託明揀金之所裁良工何遠
善價員來拂以增光寧謝滿羸之學汰之逾朗詎慙擲
地之才客有希採掇於求寶之際庶斯文之在哉

披沙揀金賦

以求寶之道同
乎選才為韻

唐
席夔

寶之至者金寶難儔何混質於微細每隨沙以沈浮不
耀其光誠觀而莫辨退藏於密故披而可求玄鑒在人
至誠斯保察晶瑩於磧礫視隱映於潭島澹以冥搜靜

而窮討翻混濁酌澄浩得之為利雖云貨以藩身揀必
於精終是不貪為寶道以之至行無越思研精既辨取
舍奚疑浩浩同流詎謂衆難分矣專專匪惑盡可汰而
出之信多雜而不混何在小而見遺故得方以選才比
諸振藻符至人和光之德明君子知微之道豈止匪固
於窮思濫於中懷至寶竊玄功披墮范而不厭積貨產
以未豐則情惟盜比而業與商同也徒觀夫敷彩汙塗
涅而不渝外濁如汨中明自殊養正以蒙潛雖伏矣從

人之欲道豈遠乎彼荆山採玉河上求珠則雙足而未
偶冒萬死而爭趨匪曰能智是為至愚曷若隱而自彰
微而可辨常保質於堅重匪淪精而展轉以是為德則
和而不同以是為賢則舉不失選况今至珍必見朗鑒
恒開細無不察大無不該在沈潛而未耀求揀鍊而斯
來亦何必披鄱陽之沙方見為寶覽士衡之賦然後稱
才

披沙揀金賦

以求寶之道同
乎選才為韻

唐張仲方

披流沙之至寶惟良金而可求諒稟質以相混信韜光而莫儔處其汙而含潔潛其剛以產柔將陶甄以入用在晶瑩而必收爾乃發彼衆彩瑩然祕寶砂礫之下自守其堅剛茫昧之中我得其精好遠邇必取纖微罔遺泛隕施以吐色洗蒙垢以成姿匪塵泥之足亂豈玉石以生疑既乍明而乍滅在沙之而汰之同至人受汚以不吝等君子藏光以俟時且流形厚地晦質玄造厥貢取戒於不貪旁求必歸於有道然後百寶惟斥三品惟

崇美價初炫微明內融晦沈潛而不雜秉熠爚以潛通
將耀質而有異豈藏山之與同鑒裁無疲期必分於醜
好拂拭相借固不假於磨礱俾精鍊以作範庶從革以
成功亦何異夫才為物表道出常途標百行以卓爾摘
繁文而煥乎每和光而不昧居衆流而有殊善惡由茲
必分真偽於焉可辨雖知已而見錄本良工而妙選將
永隔於下流且不遺於片善故明因特達道靡遑迴乍
披之而可玩亦求之而乃來同無脛而斯感豈衆口以

為猜今振藻以作賦而愧乎擲地之無才

金受礪賦

以聖無金功必資輔佐為韻

唐李程

惟礪也有克剛之美惟金也有利用之功利久斯尅猶或失其銛銳剛固不鄰是用假於磨礪不然何以興喻殷鑒譬后之聖金將有缺必假石以磨穎耀芒后若有遺必資賢而礪節砥行使貌鋒無白圭之玷令德有黃軒之盛取譬於攻金之工方期於政罔不正且夫利器久翳銛鋒不全參差冰缺掩冉苔聯價減千金之直文

滅七星之躔非夫堅石之鍛乃礪乃巧匠之藏焉修焉
又安得而昭宣若乃君上初臨德聲未溥令不盡一名
不咸五筮微子牙之兆袞闕仲山之補非夫忠臣之扶
危持顛英俊之左弼右輔又安得而稽古乃知君與臣
今相符金與礪今相須離之而道斯遠全之而德不孤
故為金也光乎九牧為君也配彼三無是以工必利其
器君先擇其佐佐明則有融器銳則不挫光芒乎擬之
必斷恬澹乎立於無過亦何必俾鈍質不可礪俟皆德

以將衰如銛刀罔能斂其鏘如朽索無或紐其維然後
乃知利重乎磨損之又損為貴君宜乎諫善人不善之
資況今聖上欽明英髦迭出恭默思道曷高宗之可侔
輔弼納忠豈傳巖之攸匹宜乎哉超義而越夔勗而自
必

河上姽女賦

以陰陽變化靈
而最神為韻

唐 獨孤授

坤載靈物母之者金稟清英乎元化耀方色乎少陰將
善利以弘博豈難得而迴深河之水配融衍以表性女

之質齊婉潔而為心無脛而將無翼而翔靜波空而鏡
朗動星駭而珠光體之則剛柔可易形之則大小無方
爛其春冰莫能解之以明庶炯爾扶露孰能晞之以朝
陽以登真者尚其變我色則為黃為丹彼神則九鍊九
轉驗此金訣求諸大化理契斯伏可得而長存致乖而
飛莫知其所舍乃有志翹鴻寶心繫紫庭閤響岑寂棲
真窅冥赫珠光之炎上陶素質之陰靈苟還丹可以變
其骨非有力所能制其形飄然將駕夫雲螭渺然或觴

於瑤池望三山以增逝顧九野而興悲後天之術兮曾
莫勤斯朝菌之秀兮不其殆而夫以見索隱以明推晦
究精理其必然玩常情以多昧伊婉女之為美諒山經
之所最且其受制黃牙可效於物寧若虛聞絳雪莫耀
於代是將涉天潢者我道其津首雲路者我清其塵方
乘化以適道孰知夫所以能神

黃冶賦

有序

唐

李德裕

蜀道有青城峨嵋山皆隱淪所託辛亥歲有以鑄金術

千余者竊歎劉向累世懿德為漢儒宗其所述作根於
聖道猶愛信鴻寶幾嬰時戮况流俗之士能無惑於此
乎因作賦以正之

漢武帝遭世界承平百蠻以寧自謂德盛堯禹功高湯
武聞昇龍於鼎湖乃甘心於虛佇有方士李少君譎詭
丕誕乘邪進取盛稱化丹砂為黃金可以登青霄而輕
舉時董大夫侍側帝曰子嘗知其術乎仲舒進曰臣唯
聞天地變化聖人鎔範方士之言以為紿誕至如圓方

為鑪造化為治鼓風為橐燄陽為火玄黃之氣絪縕和粹稟而生者為仁為智是以生實實蕃終古不匱天地之鎔範也若是及夫堯舜之化大道為鑪中和為治聲教為橐文明為火以法天為造以積賢為實是以得其鴻名後天難老至於仲尼為佐大莫能致猶鑄顏與冉抵以極摯聖人之鎔範也取類若乃不務遠德營信祕錄祈年永久以極嗜欲斯則不由於正道無益於景福帝曰善乃罷方士而去之故得漢道隆盛令名不虧

錢賦

明 黃省曾

有物於此生於太昊取諸流泉非規非矩裏方外圓非
帛非粟日用首先不足而行匪翼而騫什伍以居背腹
相聯虛中善受長於紀年好逐貪鄙恒遠聖賢芳者使
穢樸者使姦興災召戾昏智隕廉劇營務殖天下趨焉
舟波騎險驚取孔艱巧聚必散廣溢易顛臣愚不識敢
請大賢乃謂之曰此夫肉幕周美而躬被文章者歟鑪
冶陶範而鎔鍊肖質者歟逆求悖出身斃名破求之不

息老而益篤者歟充羨者仇讐為戚單虛者密親且攜
目曰銅臭清以錫鉛作偽欺世而盛顯者歟千文成貫
五銖為體凡今之人皆與終始是之謂錢理

碎珠賦

梁 吳 均

寶月生焉越浦隨川標魏之美擅楚之賢既登席而趨
麗亦綴履而升妍豈銜恩以赴時獨皎珮而騰天瀛淮
激電甘海震雷明珠碎矣於川之隈視圓流而失轉見
折水之亡迴謝驪宮之瑞飾粉靈蚌之神胎若有人兮

聲茫昧芳徽斷兮明珠碎明珠碎兮愴何宣珠之形兮
不復全撫陸離之瓊珮弔幽翳之金筵豈照車與璿燭
但黃塵及寒煙聊歌曰玉山之津兮已濡幽蘭之草兮
亦舒又聞玳瑁之獨照不見掌上之明珠已矣哉若使
青雲之可尚當與碎珠之同棲

明珠賦

唐
王奉珪

歷衆珍以探美惟明珠之獨妍自然虛靜不假雕鐫光
熠熠以照物勢規規而抱圓西山之下隨珠星而隱見

東海之上逐明月而虧全故能色奪琉璃光射金玉鮫
人泣吳江之際遊女弄漢皋之曲在蜀郡而浮青居石
家而自綠無脛而至有感必通去映魏車之乘來還合
浦之中垂輕簾而璀璨綴蛛網之玲瓏然明鑒不渝奇
如何賞觀之則符彩溢目捧之則分明盈掌使野客取
於驪龍仙帝歸之象罔豈直水懷川媚夜光晨朗而已
哉偉夫宛轉周流通冥洞幽物有求於我我於物無求
是則文魚謝恩將我酬於漢室靈蛇報德將我答於隨

侯則知珠之為用久矣為用深矣一九則鶴贈於噲參
九曲乃蟻穿於夫子所貴藏於寶匣不可避於金市有
被褐之士懷而不厭敢向君以暗投請不驚於按劍者
也

海客探驪珠賦

以上下其手擘
波及龍為韻

唐張隨

靈海洶洶爰有泉兮其深九重中有明珠上蟠驪龍難
犯之物兮不可觸希代之寶兮不可逢矧齋淪之莫究
曷揭厲之能從爰有海客賁然來適利實誘表舉無遺

策乃顧而言曰見機而作不索何獲我心苟專而至寶
可取我力苟定而洪波可擘既覽川媚之容遂探夜光
之魄伊彼勇者吁可駭也俯身於碧沙泉底揮手於驪
龍領下所謂明淺深斷取捨而已觀其發跡潛往澄神
默想俄徑寸以盈握倏光輝而在掌初解磧礫訝潭下
星懸稍出連漪謂川旁月上鄙蛟人之慷慨殊赤水之
罔象然則冒險不疑懷貪不思幸竊其寶幸遭其時向
使龍目不寐龍心是欺則必奪爾魄啖爾肌救蒼黃之

不暇何採掇而得之想夫人不亦危矣驗乎事良亦淒
其則知計非爾久利非爾有必以其道亮自至而無脛
是忽其生奚獨虞於傷手亦由貪夫徇財自貽伊咎君
子遠害唯儉是守故車乘見驕於宋客驪珠垂誠於莊
叟於戲我躬不保雖寶謂何彼險不陷雖珍則那子產
常譏於狎水仲尼昔歎於憑河因政則來格感恩則匪
他漢武帝受報於昆明之岸孟嘗君反輝於合浦之波
豈與彼而同科哉驪龍之泉物不敢入緯蕭之子一以

何急其父乃鍛其珠勗其習能往也可及不能往也不
可及

珠還合浦賦

以不貪為寶神物自還為韻

唐

尹樞

驪龍之珠無脰而至駭浪浮彩長川再媚迴夜光之錯
落反明月之瑰異非經漢女之懷寧泣鮫人之淚狀徵
既往莫究奚自偶良吏兮斯來遇貪夫兮則闕想夫旋
返之儀圓明可期輝如電轉粲若星馳光浦澈竄蛟螭
映沙礫晃連漪在暗而投誠則悲路人未鑒沈泉而隱

亦常表帝者無為欣出處兮據德幸浮沈兮中規是以
特表殊姿潛懷有道中含逸彩上繫玄造醜當時之饗
餐應為政之美好真列郡之尤祥實重泉之至寶於是
煥清瀨輝淺灣奔璀璨走爛斑豈能與石前却隨流往
還泛連波之下盈一水之間而已哉茲川兮始明老蚌
兮勿剖瓠瓠兮罷笑瓊瑰兮莫偶抱圓質而胥既揚衆
彩而未久方載沈而載浮且曷澣而曷不玉非寶泉戒
貪實為國之司南誠感神德繫物在為政之不拂愚是

以頌其實而悅其人美斯政而感斯珍想沿洄於舊渚
念涵泳於通津則知美政不遠嘉猷入神故中潛皎皛
下沈翕淪轉則無類磨而不磷誠丹泉之莫擬諒赤水
之非珍苟或疑此為虛誕願徵之於水濱

珠還合浦賦

以不貪為寶神物自還為韻

唐 陸復禮

珠行藏兮與道為鄰政善惡兮感物生神私以務貪必
去土而匿耀光之崇儉則還浦而歸淳我政無累匪求
而至宛若中流昭然明媚對三光而分色契一德而潛

致盈虛無朕不隨月魄以哉生往返有孚殊異奔星之
出使徒見其表跡罔知其奚自覩映水之新規謂沈泉
之初棄為人利也且一貫以稱珍與衆共之雖十斛而
不匱然知此珠之感唯政是隨當政至而則至偶俗離
而則離人而無道今不去何以人而有德今不復何為
止舊浦而可採同暗投而在斯質若累累疑點綴於霄
漢色仍皎皎終炫耀乎漣漪且夫彼邦政悖我則為不
居之物彼邦政間我則能應道而還豈專巨蚌是剖實

惟無脛而走將不貪以共存非甚愛之能守浦之不吝
任變化以往還珠之圓來辨政理之姦不誠可以孚明
可以久處泥沙而有光知進退而不苟利用溥博何必
取之於龍領報德弘多奚猶得之於蛇口其來也所以
輔正其去也所以戒貪警循良之夕惕俾傲狠以知慙
勿以珠為溫蓄勿以珠為珍好且還浦而難期且離邦
而難寶將守之而勿失在閑邪以存道

珠還合浦賦

以不貪為寶神
物自還為韻

唐

令狐楚

物之多兮珠為珍通其貨而濟乎人纔披沙以晶耀俄
錯彩以璘玢避無厭之心去在他境歸克儉之政還乎
舊津繇是觀德孰云無神相彼南州昔無廉吏富期潤
屋貪以敗類孤漢主析珪之恩奪蒼梧易米之利濫源
既啓真質斯閔從予舊而不遐諒天視兮有自孟君來
止惠政潛施欲不欲之欲為無為之為不召其珠珠無
脛而至不移其俗俗如影之隨爾其狀也上掩星彩遙
迷月規粲粲離離與波逶迤乍入潭心時依浦口驚泉

客之初泣疑馮夷之始剖依於仁里天亦何言富彼貪
夫神之所不沙下兮泥間韜光而自閑映石華之皎皎
雜魚目之鰥鰥豈比黃帝之使罔象玄珠乃得蘭生之
詭秦主荆玉斯還繇是發潤洲蘋增輝岸草水容益媚
澤氣彌好川實效珍地寧愛寶隱見諒符乎龍躍虧全
非繫乎蚌老豈惟彰太守之深仁可以表天子之至道
觀夫杲耀外澈英華內含飾君之履兮豈不可照君之
車兮豈不堪猶未遭於采拾尚見滯於江潭雖舊史之

錄與前賢之談終思入掬以騰價永得書紳而厲貪於
惟明時不貴異物徒飭表者招累而握珍者難屈是珍
也居下流而委棄歷終歲而煙鬱望高鑒兮閤投幸餘
波之洗拂

商丘開冰得明珠賦

唐王季友

專心所感偽物皆成若商丘之始泳得明珠於至精以
荷畚之窘揖乘軒之榮曾狎侮之不暇孰招延而有情
惟此翁者古之愚也存已性之任真謂人言之無假守

其抱朴之意不知翫人之事信河水之深曲是寶珠之
所置洪流沃日吁萬丈之層潭絕岸排雲抱千艘之險
地無鳥獸之敢近豈泥沙之可得何長舌之見欺遂投
身於不測膺騰於泉客之繳足跡於馮夷之域齏淪未
遠覺圓質之當捫混漾無涯見孤光之上逼於是握照
乘之珍出重泉之濱星輝耀掌雪彩環身當太陽之益
照射衆象而驚新虛白無瑕粲瓊華而納景清規半溼
炯冰狀而流津足使居常者駭異輕薄者居厚瞪睢盱

之拙目鉗胡盧之笑口不待驪龍之睡無勞巨蚌之剖
超萬頃而一合由素無而忽有彼非他能道在至信苟
志氣之克專實人靈之與進脫用心之疑惑必在物而
多各故事無可否精求乃獲泉非合浦尚謂出其明珠
地比荆山固可營其拱壁彼移山於海飲羽於石皆非
自然之致力緊敢而後造

西域獻徑寸珠賦

以澤浸四荒非
寶遠物為韻

唐
呂 穎

西域遐方獻純精之天產申重寶之帝鄉豈不以至誠
感而靈必自順惟德動而坤珍莫藏不然何慕有於中
土而走無脛於外荒彼珠之靈積陰之魄稟金氣而堅
固韞河潤之耀澤布指而小大無差洞物而纖毫不隔
迴夜常滿初月每讓其圓明爽曙欲凝高星自掩其孤
白信殊方所秘亦希代難致奪夏璜以為美齊楚璧而
積異將配天光以輔三助皇明而照四積石峰峻燉煌
路遠馳輝於晦磧之中流晶於白日之晚將為表龍旗

而綴鸞輅必將誇池臺而耀宮苑殊不知以萬邦為慮者此獻則違以三德為寶者此寶則非價越千金我當俯念其十產光含徑寸吾將靜照於九圍乃遂沈泉而反樸俾其媚川而自輝且立德者惟儉之本作貢者亦土之任剖蚌而獻既不編於夏書為器成之尚有干於時禁苟奪山川之精魄是虧雨露之恩浸所以前代有訓不珍異物誇齊威者再論而皆慚求蘇則者一言而自屈豈若我全明德體大道照耀也不假隨侯之珍貞

靜也自同罔象之寶由是化中國而及外夷如風之偃草

鍛破驪龍珠賦

唐李迪

彼津之叟兮愛子何多碎驪龍珠兮心亦匪他為教誠之大者猗嗟乎其義則那夫此珠者寶之至也產乎北海之重泉在乎驪龍之頷下海茫茫兮不測龍呀呀兮若鬪當求利以輕生因沒波而直透潛行伏踴既驚且覲賣萬死以觸鱗幸一冒而匪寇父兮畜我子則告之

曾是憑怒無然小慈片其珠而不納乃命石以興詞且
龍之得水變化無已奮迅而江海沸騰一噴而雲雷四
起攫拏山石碎標捎林木靡不遇睡之時必為齧粉矣
於焉抗手勃然瞋目當鍛孰云於徑寸贖罪寧論於十
斛因而鍛之星芒迸燭雖有虧於照乘亦無譏於毀匱
豈不知貴踰雙璧價重連城當之可以求富獻之可以
取榮將以謀孫翼子慎檢而行平室苟偷之路安和性
命之情不然者罔象得之而何重天吳得之而何輕如

此則南華之道尊真經之教貴以證輕重之戒以拂夸
矜之累俾龍全難得之珠人獲不貪之利揚風激俗淳
源化被酌斯事之為言緊可以用之而無既

投人夜光賦

唐 梁德裕

士有作吏君之具臣玉無能以藉手貨不足於藩身曠
歲月緇風塵為大夫兮既屈因君子兮求伸載剖厥蚌
將投於人恐魚目以相銜乃龍頷以取真得徑寸之寶
是千金之珍表裏照爛晶光動澈體有象而至圓色無

瑕而自潔滿若墜露明如積雪高秋之夜月孤上長河
之曉星未滅懿此特達湛夫龍光掩趙璧十城之價合
吳鉤千戶之鄉不假琢磨自無白圭之玷匪同銷鑠乃
越黃金之剛願輝君之掌握而燭君之殿堂必將光輔
上台儀形大道慙魏車之承照哂夏璜之有考遇物則
遷從人攸好飾春申之履曰非難得之貨遷太守之邦
蓋是不貪之寶傳可歷代賞無溢尤復喜鑒於明哲敢
自陳於暗投勿以無媒按劍而相拒勿以無脛委地而

不收同作貢於楚國而便契於隨侯俾懷寶之君子盡
銷聲而莫遊

蟻穿九曲珠賦

以延一縷以
尋之為韻

唐 楊 濤

蟻為質兮微渺珠有竅而虛圓苟一縷之是繫雖九曲
而可穿當通幽以洞微絲莫能貫俾有條而不紊蟻可
知先始蠢蠕以中出稍連繚而外延豈不以內彼鴻輝
曳茲纖縷纔容小往之徑乍見規行之迂入惟追典窮
瑩質以誠難途非履端觀巧歷而可數宛轉而進縈紆

是尋似登折坂之峻如出重泉之深始九折以漸達終
一貫而克任去似洞中方遊剖蚌之質動殊牀下奚聞
鬪牛之音是知聖者之使宛如窮理誠在小而罔遺俾
入微而有以蟻周遊而在內進必束身絲抽縷以貫中
出如繞指隔青縈而可見如遙遠而未已苟非委實而
行之安得茹柔而展矣詰屈若茲周流出之當曲轉之
中才可容髮既旁通之後亦既牽絲苟柔弱之是引則
繚繞而莫辭雖云曲徑而入終殊在珥之時斯則貫纍

繫而匪匹達規規而如一求蹊而投彼夜光出室而曾
非時術茲蟲也小而近智故可以穿無額之質

綴珠為燭賦

以有光照夕深
宮朗然為韻

唐王 棖

碧雲初合兮金烏已藏深宮欲暝兮歡娛未央因綴明
珠之彩將為列燭之光出寶篋以規圓呈姿璀璨入雕
籠而豔發香照熒煌當其竹箭迎昏蘭林向夕司烜氏
却朱火之耀守藏吏進驪龍之魄然後紫縷花抱籠紗
霧隔亦猶燎紅蠟而蕪靈麻可得燒椒房而煥瑤席風

來不動凝四座之清輝夜久逾明貯一堂之虛白由是
價掩聯珞形疑列錢誠非其人火曰火可謂乎自然而
然本出蚌胎翻為龍銜於玉宇從離蛇口幾驚蛾拂於
瓊筵觀其布質闌干含輝晃朗分持而清夜星列迴舉
而寒軒月上纍纍交映曾無見跋之嫌爛爛相鮮誰起
偷光之想莫不揚彩金屋增華桂宮幕以煙綠布而燄
紅欄檻如曉杯盤若融孕美於瑠璃窻裏淪精於雲母
屏中是以名擅夜光功叅庭燎妍醜無隱毫芒必照故

得結綠懸黎之寶不敢稱珍龍膏豹髓之燈於焉寢耀
且飾履者於義尤侈為簾者其功未深曷如倣此圓潔
資乎照臨遂使或怨長宵得縱秉遊之樂有居幽室不
生欺暗之心雖則魚目難儔金釭非偶終罹好寶之誚
不免窮奢之詬燭兮燭兮儒執智以為之視隨侯而何
有

御定歷代賦彙卷九十七

欽定四庫全書

御定歷代賦彙卷九十八

玉帛

空青賦

梁江淹

夫赤瓊以照燎為光碧石以歲澌為色咸見珍於東國
竝被貴於西極況空青之麗寶挺山海之不測其所處
則峻巘層石龜穴龍壁素岸成雲蘋砂如磧外隱青苔
丹草內伏玉枝瑪瑙銅鈎合生磬確堅英自非索嶮覓

危乘鸞履螭倦春厭秋斲異鐫奇能得厠於軒宇接君子之光儀於是寫雲圖氣學靈狀僊寶波麗水華峰豔山陽谷之樹崦嵫之泉西海之草炎州之煙銀臺之烏穆王之馬都廣之國番禺之野皆咫尺八極鏡見四荒雲煙始出日月既張若夫邃古之世汗漫窈微惟此青墨所以造之至乃翠燦軒室蔥鬱臺殿雜蛟龍之文章發麟鹿之炳絢騁神形於鐘簋舒怪物與雷電亦有曲帳畫屏素女綵扇錦色窈鬱綺質曼行點拂濃薄如隱

如見山水萬象丹青曲變成百鑑之可珍亦千金而不
賤雖楚之夏姬越之西施趙妃燕后秦娥吳娃溺愛靡
意魂飛心離侯青鬢為藻飾方艷紅華與素儀冠衆寶
而獨立信求之而無虧

馬瑙勒賦

有序

魏文帝

馬瑙玉屬也出自西域文理交錯有似馬瑙故其方人
因以名之或以繫頸或以飾勒余有斯勒美而賦之命
陳琳王粲並作辭曰

有奇章之珍物寄中山之崇岡稟金德之靈施含白虎
之華章扇朔方之玄氣喜南離之焱陽歛中區之黃米
曜東夏之純蒼苞五色之明麗配皎日之流光命夫良
工是剖是鑄追形逐好從宜索便乃加砥礪刻方為圓
沈光內灼浮景外鮮繁文縟藻交彩接連嘉鏤錫之盛
美感戎馬之首飾固茲物之攸宜信君子之所服爾乃
藉彼朱罽華勒用成駢居列峙煥若羅星

馬瑙勒賦

有序

魏陳琳

五官將得馬瑀以為寶勒美其英彩之光豔也使琳賦之

託瑤漢之寶岸臨赤水之朱波爾乃他山為錯荆和為理制為寶勒以御君子

馬瑀勒賦

魏
王 粲

遊大國以廣觀覽希世之偉寶總衆材而課美信莫臧於馬瑀被文采之華飾雜朱綠與蒼皐於是乃命工人裁以飾勒因姿衆形匪雕匪刻厥容應規厥性順德御

世嗣之駿服表駉驥之儀則

車渠椀賦

有序

魏文帝

車渠玉屬也多纖理縉文生於西國其俗寶之

惟二儀之普育何萬物之殊形料珍怪之上美無茲椀
之獨靈苞華文之光麗發符采而揚榮理交錯以連屬
似將離而復并或若朝雲浮高山忽似飛鳥厲蒼天夫
其方者如矩圓者如規稠稀不謬洪纖有宜

車渠椀賦

魏

曹植

惟斯椀之所生於涼風之浚湑采金光之定色擬朝陽
而發揮豐玄素之暉曄帶朱榮之歲凝蘊絲綸以肆采
藻繁布以相追翩飄颻而浮景若驚鵲之雙飛隱神璞
於西野彌百葉而莫希於時乃有篤厚神后廣被仁聲
夷慕義而重使獻茲寶於斯庭命公輸使制匠窮妍麗
之殊形華色燦爛文若點成鬱蓊雲蒸蜿蜒龍征光如
激電影若浮星何神怪之巨偉信一覽而九驚雖離朱
之聰目內炫耀而失精何明麗之可悅超羣寶而特章

卷九十八
侯君子之間宴酌甘醴於斯觥既娛情而可貴故永御
而不忘

車渠碗賦

魏應瑒

唯茲碗之珍瑋誕靈嶽而竒生扇不周之芳烈浸瓊露
以潤形蔭碧條以納曜喻朝霞而發榮紛玄黃以彤裔
眊眊變而龍華象蜿蜒之輔體中含曜乎雲波若其衆
色鱗聚卓度詭常綢緼雜錯乍圓乍方蔚述繁興散列
成章揚丹流縹碧玉飛黃華氣承朗內外齊光

車渠椀賦

魏王粲

侍君子之宴坐覽車渠之妙珍挺英才於山岳含陰陽之淑真飛輕縹與浮白若驚風之飄雲光清朗以內曜澤溫潤而外津體貞剛而不撓理修達而有文雜玄黃以爲質似乾坤之未分兼五德之上美超衆寶而絕倫

瑪瑙椀賦

陳江總

翠羽流霞之杯諒無聞於瑋麗豈匹此之奇瓌爰覩殊特臻自西國狀驚鶴之點漬似遊龍之割刻士衡譬之

雲采中郎羞其馬勒於時北園清夏東閣浮涼山交枝
而影雜水沈葉而流香蟬無風而引短鷺出迴而飛長
副君海渟岳峙紙落金鏘獲阿宗之美寶命河朔之名
觴寶出崑崙之仙阜觴即玄洲之玉酒酒既醉而還年
椀稍酌而延壽仰天縱之體物銘鼓器兮何有

瑤瑁椀賦

晉 潘 尼

有瑤瑁之奇寶亦同旅於介蟲下法川以矩吏上擬乾
而規隆或步趾於清源或掉尾於泥中隨陰陽以潛躍

與龜龍乎齊風包神藏智備體兼才高下斯處水陸皆
能文若綺波背負蓬萊爾乃遐夷效珍越裳貢職橫海
萬里踰嶺千億挺璞荒巖擣藻辰極光曜炫晃昭爛煥
施嘉斯寶之兼美料衆珍而靡對文不煩於錯鏤米不
假乎藻績豈翡翠之足儷胡犀象之能逮

琉璃椀賦

晉 潘 尼

覽方貢之被珍瑋茲椀之獨竒濟流沙之絕險越葱嶺
之峻危其由來也阻遠其所託也幽深據重巖之億仞

臨洪溪之萬尋接玉樹與瓊瑤鄰沙棠與碧林瞻閭風
之崔嵬顧玄圃之蕭參於是遊西極望大蒙歷鍾山闕
燭龍覲王母訪仙童取琉璃之攸華詔曠世之良工纂
玄儀以取象準三辰以定容光映日曜圓成月盈纖瑕
罔麗飛塵靡停灼爍旁燭表裏相形凝霜不足方其潔
澄水不能喻其清剛過金石勁勵瓊玉磨之不磷涅之
不濁舉茲枕以酬賓榮密坐之曲宴流景炯晃以內徹
清醴瑤琰而外見

水晶盞賦

有序

明
靳學顏

西亭子觴予會景之亭出水晶盞焉命曰子能賦諸顏
唯唯而賦曰

有太陰之凝魄抱玄英之至質發坤藏於重艮托哲匠
而呈則既騁技於刀鋸巧天然而弗飾元精既理於焉
從規馳若遺景駐無藏疵方宜凌厲乎鑿落就執熱而
不融胡浮溫之在掇羌有質而能容若乃瑤宮燕宴桂
館嬋娟闢琉璃之甲帳綴明月之高懸幽蟾散馥素姬

承盤挹上池之靈漿酌明水於金仙席之玄茵薦以蒼
筵覆之冰縠繫以霜綸澄望若空扣泠泠然含有於無
匪色而妍惟德其物御惟哲人

碎琥珀枕賦

以良藥是資奇
物非寶為韻

唐 獨孤授

琥珀為枕兮可保而持欲加首兮金瘡是資况無用於
寢戈之日固非全於枕轡之時在寶難求不藉金之堅
也其脆易破無勞斧以斯之豈為我寶用安爾止况將
展轉之狀用救通中之瘡分好惡於千載之安定剛柔

於一人之捶莫投金柱相如之璧則非不隕霜鋒子雲
之珍焉是夫其鏗然始解發耀騰暉定錙銖詎論乎大
小考多少未極乎精微異色旁分兮渙然冰釋虹光中
裂兮溘爾星飛然後霞彩斷角勢違豈同摘玉之流去
彼取此殊異毀珠之日辨是與非美夫節彼用物視其
豐約始如席上之珍忽碎封中之藥念刮骨之痛爾將
束手於無為在抗首之時我則曲肱而奚若故遠於患
無或不良叩兩端兮乍疑分寶摧一角兮尚可含章在

目無全似假庖丁之術應手而碎不同石氏之強雖謂
大道不寶吾道則屈固非合散之流不是羣分之物假
以術將為美絕代稱奇昔為永堅之好今傷善價之儀
偕符氏之堅名果遭貞石同五鹿之神角或遇金鉗猶
能動彩熠熠馳精杲杲難分走海之靈尚認沙洹之寶
徒美夫棄其異而斥其好曾不知失其枕而獲其道

琥珀拾芥賦

唐何據

天地之根孰知其源倏而化化歟爾存存琥珀拾芥鳳

形精叢物之冥會出乎意外於是氣以冥合物由化造
礎因雲以積潤燧取火而就燥伊琥珀之為珠亦鳳形
而吸草既璀璨錯以瓊豔又熒煌而金藻爾乃探其至蹟
持其自然手與心愜視與目全美寶擢色以臨矣飛芒
乘虛而附焉此見幾而作間不可省彼因感而應道不
可傳故能異質脗合殊途玄通播形的皪透影玲瓏似
乎月含桂以貞明泉泛籜而映淨雲發彩於虹玉竹乘
陰於鵲鏡虞都尉見而言曰昔者楓丹岸綺松翠山衣

膏淪甘壤珠孕清輝全其真詎蜂巢之所僭守其樸寧
鶴卵之能希進乎潔已一薰一蕕而竝採德以繫物拾
蕭拾艾而同歸且珠之於寶也至貴芥之於草也至微
不以貴而黜管蒯不以微而替葑菲君無謂我腐為螢
有耀君之經是照君無謂我弱為舟有微君之流可乘
物猶尚爾人亦諒只若泰初之偶蒹葭長公之俯青紫
生芻對如玉之容芳荷被懷琰之士則珠豈草以相期
芥得珠以成美吾乃今知然乎至矣

瑠璃牕賦

以日燦煙融如
無礙隔為韻

唐王棨

彼牕牖之麗者有瑠璃之製焉洞徹而光凝秋水虛明
而色混晴煙皓月斜臨陸機之毛髮寒矣鮮飈如透滿
奮之神容凜然始夫創奇寶之新規易疎寮之舊作龍
鱗不足專其瑩蟬翼安能擬其薄若乃孕美澄凝淪精
灼爍棟宇廓以冰耀房櫳炯其電落深窺公子中眠雲
母之屏洞見佳人外卷水精之箔表裏玲瓏霜殘露融
列遠岫以秋綠入輕霞而晚紅滿榻琴書杳若冰壺之

內盈庭花木依然瑤鏡之中故得繡戶增光綺堂生白
靚懸蟲之舊所疑素蟾之新魄碧雞毛羽微微而霧縠
旁籠玉女容華隱隱而銀河中隔幾誤梁燕遙分隙駒
比曲櫺而頓別想圭竇以終殊迴以視之雖皎潔兮斯
在遠而望也則依微而若無由是蠅泊如懸蟲飛無礙
光寒而珠燭相逼影動而瓊英俯對不羨石崇之館樹
列珊瑚豈慙韓嫣之家牀施玳瑁如是價重瑣闥名珍
綺疏徹紗帷而晃朗連角簾而清虛倘徵其形王母之

宮可匹語其巧大秦之璧焉如然而國以奢亡位由侈
失帝辛為象著於前代令尹惜玉纓於往日其人可數
其類非一何用崇瑰寶兮極精奇置斯牕於宮室

珊瑚樹賦

唐仲子陵

珊瑚生矣於彼滄溟稟精於天地之氣擢秀於魚龍之
庭含九泉之滋液冠百寶之神靈在涅不緇既同象玉
之潔有枝無葉亦如見樹之形當其萌芽欲成根柢初
結同堅冰之有漸類陰火之潛熨瓊枝碩茂鐵網森列

貫纖目而玲瓏映重泉而昭晰海人於是方舟以進拭目而觀牽夫密網出彼清瀾潤奪白虹之氣光連赤玉之盤厥價伊何有逾於琥珀其色則爾取類於雞冠及夫漢帝思仙神君降質堂惟大小帳有甲乙植以珊瑚之樹綴以明珠之實何幽茂以凌秋獨青蔥而照日亦有王家貴戚石氏財雄爭豪世上使氣胸中視珊瑚之若芥運如意以成風彼植之為貴此碎之又何謂諒無補於經綸徒見稱於祥瑞今也聖人御天所寶惟賢歛

雲物之容不書於策斯珠玉之脛而沈於泉車有龍首
鸞衡不以珊瑚為柱馬有乘黃茲白不以珊瑚為鞭故
雖古人之所貴獨吾君能舍旃

通犀賦

以溫潤而澤厥
文自然為韻

唐王損

犀有異角其名通天外徑挺以孤聳內清明而自全匪
刻匪雕既含章而無隱如追如琢亦通理於未然當其
遠徵搜備琛賁得自烏鳶之野斷以龍泉之刃瑟兮素
理如線之狀既呈灼爾清光似玉之形方潤豐下銳上

勢圓質峻儻成象以表奇必駭難而取信明微以驗分
剗是資美勝截肪之日珍逾剖蚌之時素光的的而中
貫玄彩規規而外滋良玉無瑕既呈奇而異矣白圭有
玷將配美兮遠而故其分堅貞比金石光通上下色潤
膏澤透掌而纖粟必分窺天而秋毫不隔况本精粹蓄
綢緼依稀象物皎潔成文或似雙魚映綠水而鬐鬣皆
見偶成孤鶴翔碧霄而羽翮斯分則知變態不恒衆美
難越契人情之用矣豈天意之貽厥故能貞而不變明

而不昏粲奇文之炯炯暢美質之溫溫則貝有文兮不
必為異義列卦兮何足而論究其所然徵其所自雖常
情難得之貨蓋造物偶然之意何異夫筆誤點而狀蠅
蟲食葉而成字若然者則文犀之美故不足為瑰異

擣素賦

漢班婕妤

若乃廣除懸月暉木流清桂露朝滿涼襟夕輕改容飾
而相命卷霜帛而下庭曳羅裙之綺靡振珠珮之精明
若乃盼睐生姿動容多致弱態含羞妖風靡麗於是投

香杵叩砧擇鷺聲爭鳳音梧因虛而調遠桂由貞而
響沈散繁輕而浮捷節疎亮而清深調非常律聲無定
本任落手之參差從風颺之近遠或連躍而更投或暫
舒而長卷侈長袖於妍袂綴半月於蘭襟表纖手於微
縫庶見跡而知心計修路之遐曼恐芬芳之易泄書既
封而重題笥已緘而更結

擣練賦

唐 魏 瓘

細腰杵兮木一枝女郎砧兮石五彩聞後響而已續聽

前聲而猶在夜如何其秋未半於是拽魯縞攘皓腕始
於搖揚終於凌亂四振五振驚飛鴈之兩行六舉七舉
過彩雲而一斷隱高閣而如動度遙城而如散夜有露
兮秋有風杵有聲兮衣有縫佳人聽兮意何窮步逍遙
於涼景暢容與於晴空黃金釵兮碧雲髮白素巾兮青
女月佳人聽兮良未歇擘長虹而乍開凌倒景而將越
是時也餘響未畢微影方流逶迤洞房半入宵夢窈窕
聞館方增客愁李都尉以胡笳動泣向子期以隣笛增

憂古人獨感於聽今者况兼乎秋屬南昌舊福東魯前
丘昇黃綬之堂論文謝賈入素王之廟捧瑟齊由願君
無按龍泉色誰道明珠不可投

繡賦

梁張率

尋造物之妙巧固飾化於百工嗟莫先於黼黻自帝虞
而觀風雜藻火與粉米鬱山龍與華蟲若夫觀其締綴
與其依放龜龍為文神仙成象總五色而極思藉羅紈
而發想具萬物之有狀盡衆化之為形既絲華而稠彩

亦密照而疎明若春濕之揚蕩似秋漢之含星已間紅
而韻紫亦表玄而裏素間綠竹與蘅杜雜青松與芳樹
若乃邯鄲之女宛洛少年顧影自媚窺鏡自憐極車馬
之光飾盡衣裳之妖妍既徙倚於丹墀亦徘徊於青閣
不息末而反本吾謂遂離乎澆薄

蜀江春日文君濯錦賦

唐張何

粵惟姑洗應律勾芒御辰鴈橋風暖犀浦花新疊嶂紫
郭長楊映津軒車照地士女驚人風土堪樂山川可珍

歲時不殊於荆楚形勝有類夫咸秦晚景彌秀晴江轉
春即有卓氏名姝相如麗室織迴文之重錦豔傾國之
妖質鳴梭靜夜促杼春日布葉宜疎安花巧密寫庭葵
而不欠擬山鳥而能悉績縷嫌遲嘖蛾慕疾乍離披而
成段或煥爛而成匹言濯春流鳴環乃出於是近深沈
傍清泚朱顏始映珍篋方啓其始入也疑芳樹影落澗
中少將安焉若晴霞色照潭底奪五雲長風未散泣百
花微雨新洗爾乃曝林崖出泉洞遲日徐轉和風緩送

稍變迴鸞全分舞鳳戲蝶時遶嬌鶯欲弄乘春景而方
收俟王正而入貢懿其彩色足重鮮明可嘉青為禁柳
紅作宮花能使衛尉紫障夫人飾車郎官居而列宿郡
守衣而還家若夫齊紈之與楚練豈非細縠之與輕紗

迴文錦賦

以文思精絕古今傳賞為韻

唐張仲素

昔竇滔之于役從軍伊小婦兮玉潔蘭薰對鳴機以抽
恨織美錦而成文攢萬緒之荏苒揉衆綵之綢緼腸迴
而綠字初結髮亂而青絲共棼萋兮斐兮常屬思於黃

絹不日不月長寄懷於碧雲其始也軫蕙心蓄藻思披
黃流之渥彩等後素之繪事循環而覽夫言豈一端宛
轉而求則韻皆居次寫別既久怨心有盈錦霞駁而增
麗詩綺靡而緣情自發於巧心素手何慙於墨妙筆精
當其用寄遠方臨風載閱跡類雕蟲文如委纈既連珠
而復貫又通理而不絕居人言念緘萬恨而在中君子
置懷字三歲而寧滅是繹是尋攻乎織紵宛而成章見
色絲之麗永以為好表美人之心儻或以新而代故豈

殊陋古而榮今黼黻不同愁閱目而等耀彩章自異懼
讒口之見侵况復委篋多年化塵千古方爛今如在復
燦今可覩藻豔波旋環迴輻圓蘊四愁而難解煥五彩
以相鮮猶或踰繡段勝彩牋貴以文自奪駕衾之價贈
乎遠無勞雁足之傳且物在人亡留思長想謂其文之
著也可卷而懷謂其製之貴焉乃攄而賞若知七襄之
非匹豈玉案之虛往

迴文錦賦

以文思精絕古今傳賞為韻

唐
皇甫威

彼美人兮懸隴雲念塞上之征客迴機中之錦文千里
馳心十年誓志相關山之延夢託丹素而垂意札札鳴
杼紛紛積翠梭曳緒而龍迴錦披雲而鳳至情生萬象
功歸一致綠為芳草怨王孫之不歸紅作仙花發美人
之幽思懿夫達其意者在乎誠為其藝者貴乎精顧異
物之可賞諒同心之所成離披而芳樹搖影煥爛而明
霞近榮振素手以鳴機蘭閨霜集斂翠蛾而績縷紗牕
月生則知妙極十全才先一絕既以彰其意亦以表乎

節類乎錦卓氏服以妍精言乎詩謝女慙乎清切稽六
義而不忒方百花而迴別心唯念遠將續縷以同營宇
是迴文與愁腸而共結成乎手發乎心銳精思而在今
方之紈比之素積玄功而冠古笑草露之輕薄勝林花
之新吐宛矣麗矣錯金彩以成章寂兮寥兮零玉筍而
如雨於是披閱風前光文爛然百花互進五色相宣文
彬彬而愴矣彩重重而恨焉匪類雕蟲工乎織豈徒悅
目寄乎邊寫片心之贈遠代尺素之相傳一則託乎情

金史卷之八
卷九十八
一則存於想謂乎錦也可裁心乎足賞君乎君乎發絨
封知精誠之不爽

臨風舒錦賦

以賦之明麗
當如此為韻

唐

閻楚封

風響清韻錦明色絲閎攢花之麗絳當偃草之驚時拂
袖而起翻光益滋始暉暉之展也俄習習以動之且爛
兮則舒爰假不周之力及斐然而異誠同絕妙之詞爾
其黼黻言開浸淫遠度蘊鳴梭之巧思比擲地之麗賦
暉光亂起如蕩漾之波翻彩狀閒飄若逶迤之霞布觀

夫引曳交映彰施煥盈當大塊之初發遇迴文之已成
奪雲彩曜日晶激颼颼而愈疾動獵獵而增明向水而
搖似挂帆之欲去當筵而列謂施障之將行况復入座
輕冷橫空掣曳當蜀郡之新濯擬潘文而更麗綢繆乍
舉時牽素手之中煦嫗潛來遠自青蘋之際晚映花戶
暗臨洞房簾煙暉之照灼騰藻豔而飄揚裊輕吹鑠流
光扇涵和而迴觸攄炳麗而前當五色相宣喻體物之
詞彩八風迭起駭織文之鳥章且蕭颯初戾紅明正舒

照瑣牕而粲矣煥雲幄以暉如彩曜克宣諒本因於剪
飾精華可翫終亦藉其吹噓是知修時者莫貴其精微
製錦者莫尚其綺靡善染翰之瑰麗狀臨風之綺旒懿
哉文之義也諒發明之在此

海人獻文錦賦

以珍物時來以
應君德為韻

唐 李君房

彼潛織兮泉室之人曳文綃兮結冰縷灼錦彩兮照花
新背窮海以入貢望君門而效珍於以獻之爰彰至德
非同恍氏之練更異仙家之織臨風始啓全含琪樹之

芳向闕爰開遙寫蜃樓之色固竒工之所就豈常情之
可識當其綵縷方織鳴梭靜聞絢霞光於陰火綴緡藻
於卿雲舞鳳翔鸞乍徘徊而撫翼重葩疊葉紛宛轉以
成文疑映地之花折似飲渚之虹分弄杼斯成既呈妍
於泉客垂衣可仰欣有奉於明君啓瑤緘而駭視方霧
縠而難擬離披耀彩臨玉砌以蓮舒燦爛生姿映金門
而霞起固將保其所異孰能識其所以投熾焰而靡燎
為灰濯清流而不濡於水原夫獻琛方至捧篋員來臨

虛庭而障倚俯洞戶以屏開蝶翩翩而誤起鳥盼睽以
驚迴物無情而自感化有孚而斯應以文為貴寧同卷
伯之詩表德方來且異美人之贈非同禹貢不謝堯時
對天庭而照燭向麗景而藏蕤皎潔凝光爰識冰蠶之
緒霏微發色不惟園客之絲既而煥彼文章作為黼黻
方可重於遠人寧有譏於翫物

冰蠶賦

以凝泣之境成
彼奇巧為韻

唐王起

懿北極之寒勁有珍蠶之處冰匪柔桑之是食匪幽室

之是憑託彼峨峨且不資於春煦抽其曳曳自有樂於
陰凝既違燥而就溼知同類而殊能爾其玄律窮芳歲
暮百谷風壯羣川冰固遊片片之凝光映重重之積素
十畝之間兮洩洩何勞六尺之內兮涓涓正汙既苦寒
而不倦將載績而是務觀夫如臨如履經之營之隔皚
皚之積冰吐漠漠之輕絲朱綠曳而愈出黼黻成而是
資煥乎有章宣寒女之能得超然獨處信夏蟲之所疑
淋漓未泮組織方逞匪綠於盆匪懸於井蠶事登矣必

因之而剖冰繭稅求焉將取之而越境豈比夫風戾之所生歲單之所成蠶月而方育蠶器而見營安能苦其節履其貞窺之有戰戰之色取之有冲冲之聲匪樹而遊奚感仙而化不筐而績奚假蟬為名宜乎海人見彩堯帝斯呈伊蠹蠹之繁委實生生之殊詭鼠遊冰下我亦來思龜生火中吾乃異彼況乎雪霜是履鱗角多奇若解以東風或泉魚而共躍藏諸北陸幸凌人之見知宜乎舍章勿改牽絲有待儻來獻於九重必相宣於五

彩

海人獻冰蠶賦

以四夷即敘海
不藏珍為韻

唐張良器

圓嶠之山兮迴踴遐壤旁臨窮海嘉冰蠶之底貢彰遠
人之無怠原其稟氣斯異含靈有待鱗角是帶育七寸
之殊形雪霜載加發五彩之異色資纖縷以成績弄杼
攸勤美重錦之可持女工能即施勞且異於三盆為用
寧同於五絨致美之厚罔差其妍不入獻之光必資於
善良驚楫云邁懿筐是將涉三山之重阻辭萬里之遐

荒越滇漲居帝鄉昇玉殿薦君堂示彼有誠則申屈膝
之勢樂我無事願充垂拱之裳蓋威靈之有及故珍物
之不藏懿乎生乃因地育乃非時四氣平分居嚴冬而
成止五方異俗在中國之莫為自堯年而效美暨今日
而來思足以彰德風之普洽表王道之清夷不然則脩
路崎嶇洪連澍澤較道里而累億罹寒暑而數四匪化
理而無虞曷員來之可致彼躬桑載育獻繭為均浴濯
龍之水漲川館之春而後羅紈是績筐筥攸陳固在常

而可悅殊自遠而為珍是知化之所被物無不臻德之
所加人無或阻託茲賦以極思臻皇猷之焯敘

海人獻冰紈賦

以四夷即敘海
不藏珍為韻

唐

韋執中

憬彼員嶠兮阻夫窮海厥貢冰紈兮備諸渥彩產非中
夏故致用之所資來自殊方表懷人之斯在然則蠶雖
土育紈實人力稟鱗角以成質則或屈或伸因冰雪以
爽容而匪雕匪飾作九服之上貢應五方之正色雖寒
暑鱗次必藉至陰之時而風土所宜則異中和之域既

生既育是準是則諒因時之所致實希代之莫識所美
夫得之斯難所貴夫遠而能即亦由我后洪化浹洽淳
風遐被方五帝而可六比三王之可四是使貢獻遠物
德格異類爰發跡於僻界肆涉遐而執贄獻土地之所
生攜篋筐之云泊亦既覲止侯其孔臧不灼不濡將火
鼠以比義或朱或綠豈種花之足方既同練雲繚繞而
交映又似仙花曄曄而含芳間袞龍以發色集黼黻以
成章昔苞茅不貢昭周室之壞法令冰紘入獻覲邦家

之耿光非夫混一車軌茂育華夷何則不遠其遠獻茲
在茲既有勞於跋涉亦多歷於歲時標為貢首雖一時
之可不獻於君所知四方之咸敘是則其求匪易其用
何珍儻見加於剪拂庶暉光之日新

鮫人賣綃賦

以難得之貨色
如輕霧為韻

唐

馮宿

彼巨海兮鮫人是居作輕綃兮厥狀紛如不日而成固
可卷而懷也侯時將見期善價而沽諸出波心而月彩
相絢映泉室而雲陰乍虛其來不測其麗何極行市道

而莫知訪人寰而未識非運思於文繡詎用功於紡織
足使大賈慙容衆珍掩色豈重錦之云比諒千金而求
直夫鮫者水府之所生綃者鮫人之所成奇貨聿來寧
假手於蠶績變形斯至非挂籍於王征方霧縠而猶薄
擬冰紈而更輕苟未知而不售恒固執而潛行皓如凝
露紛若遊霧爰潔爾容不愆於素質初階於蜃蛤名不
登於貢賦知慢藏誨盜哂泉客之遺珠悟冶容誨淫恥
風人之抱布偉夫遊洞穴媚清瀾趨市人遠凌波路難

貴樓金真詎關乎日浴出潛離隱豈效於泥蟠且深不可測赤水之珠求得往莫可追漢臯之佩且欺是綃也成於無朕動若隨時辭海底之潛處赴日中之會期屬吾皇斥無用之寶賤難得之貨徒待價而稱珍庶轉身而遠播

奇布賦 有序


魏
殷 臣

惟泰康二年安南將軍廣州牧滕侯作鎮南方余時承乏忝備下僚俄而大秦國奉獻琛來經於州衆寶既麗

大布尤奇乃作賦曰

伊荒服之外國逮大秦以為名仰皇風而悅化超重譯
而來庭貢方物之綺麗亦受氣於妙靈美斯布之出類
稟太陽之純精超常品乎意外獨詭異而特生森森豐
林在海之洲煌煌烈火焚焉靡休天性固然滋殖是由
牙萌炭中穎發燼隅葉因醎潔翹與炎敷焱榮華實焚
灼萼珠丹輝電遊彤炯星流飛耀衝霄光赫天區惟造
化之所陶理萬端而難察燎無灼而不焦在茲林而獨

昵火焚木而弗枯木吐火而無竭同五行而並生與大
椿其相率乃採乃析是紡是績每以為布不盈數尺以
為巾帔服之無數既垢既汙以焚為濯投之朱爐載然
載赫停而冷之皎潔凝白



御定歷代賦彙卷九十八